



# TONGTEPRATEP

A MONTHLY CHURCH BULLETIN OF DIMAPUR AO BAPTIST AROGO | DIMAPUR | VOL-III | ISSUE 9 | 4 PAGES

◆◆◆◆◆ SEPTEMBER 2019

## YOUTH MINISTRY OSANG

LIMAAKUM | YOUTH DIRECTOR I/C

### 1. Youth Evangelist Life Revision Week Sentong

**S**eptember 2-6 nung Counsellor Dr. N. Moa Imsong ajanga Youth Evangelists nem sessions 11 agia training temoatsü ngua agütsüogo. Youth Evangelist aser Lanur ministry dak sendakba nung tesayuba jenti agüja interactive sessions agia liasü.

Tesayubatem itemi liasü: Youth Evangelists' Role in Nation Building, Building up Youth and Generation leaders, Knowing oneself: The Evangelist You Are, Knowing the different stages of Youth and its psychology and development, likes and dislikes. Iba training nung angazükbatem amshia maneni lanur wadang nung tali temotsüba nung inyaktettsü asenoki asen Youth Evangelists atema sarasadem nung yaridi.



### 2. Goodwill Friendly Cricket Match with Friends of Other Faiths

28<sup>th</sup> September nü Goodwill Friendly Cricket Match Muslim Community den saya liasü. Dimapur yimti nung tamangba yimsü jenti moyoktepa alir aser item tsüngda nung yimjung, tesünep aser temeim alibatsübaji kanga tenüngdaktsü. Maneni, iba sports contextual ministry ajanga tanga tamangba yimsü lanurtem den friendship yanglua Khrista kuli asütsü nükjidong nung iba sentong agiogo. Asen Sannüker Rev. I. Watı ajanga tayongzükba tulu agüja sarasademer sentong tenzükba ama temoatsü ngua agiogo.



### 3. Made in DABA 4<sup>th</sup> Edition

(Reporter: Tajunglemla, Teintet Lanur Secretary)

2016 nungi tenzüka DABA Youth Ministry-i "Made in DABA" sentong agia arudagi. Taküm küma 2<sup>nd</sup> October 2019 nü 4<sup>th</sup> Edition AKTD Jubilee Park, Supermarket nung agia liasü. Local entrepreneurstem stall ajak agi 25 liasü aser stall telemsa yamai liasü: Wood works & handicrafts, accessories, packing/food court, art & painting, furniture, perfume, handmade soaps. Iba anogo nung item local entrepreneurs ajak indang total profit ₹. 80,000 – 90,000/- liasü. Praise and Worship aser sentep agia iba sentong shibang.



Made in DABA sentong ajanga lanurtem karbo established business jenjang nung lir aser nüburtemi metettsüsa takok ngua arudagi. Pei sasa yanglutetba mapa ajanga lanurtem unemployment nungi kümzüker aser self-sufficient akümer. Tsüngrem temeim aser taochi ajanga sengtongtem ajak takok nung tembang.

Dimapur Ao Baptist Arogo (DABA) Duncan, Dimapur - 797113, Nagaland  
Office: 03862 - 226438 / 229032 | Email: daba.tongtepratep@gmail.com, daba@dabaarogo.org



# Editorial

A. SENTIYULA

## Zebedi'er Chirtem Tetsü

**Mathi 20:20-21** “Idangji Zebedi chirtem tetsü pei chirtem den pa dangi aru, pa külema, pa dang langka meshi. Aser pai la dang ashi, “Nai kechi aginür?” Lai pa dang shir, “Item kük chir ana, ne yimli nung ne tajichilen ka aser ne tabelen ka ta amentsü melaang.”

Felicity Huffman aser Lori Loughlin na ya Hollywood actress ana lir aser tena osang tamajung ka nung tetshir. Tenati tim masuba inyakyim ajanga tanur college tajungtem nung züngdaktsütsü merangba putet. US linük ajungalen college entrance exam nung ashikülakba ken o ka nung tena densema lir. America nung university tajungtem nung undergraduate admissions agiba nung tim mesüi inyaktsü tasa atongba ken o ka ajanga iba ashishitep onük temai adoka prokshi. Actress ana ya dena college azüngrü atema tenüng agütsüba kaketsirtem tsürabur 33-i iba inyakyim tenzüksangnem entrance exam nung marks aika anguba ama yanglutsü aser college ketdangsürtem nem süpokrem agütsütsü atema 2011 nungi 2018 tashi nung 25 million dollars tema agütsüogo ta tai tonglokja lir.

Tetsütemi pei tanur tajungtiba agi anepaluba aser tali awaloka oa inyakbaji dang tasen masü. Temalen shia aliba Laishiba tekong ajanga Yisu alima nung aliba mapang nunga, iba mesükba tetsü ka liasü aser lai lar jabaso ana (Yisu nütsüng)- Yakob aser Yohan na Yisu'er yimli nung pa tajichi aser tabelen mendaktsünüa liasü. Lai iba temepishiba agütsüba ajanga tanga nütsüngtem jashidaktsü aser iba ajanga parnok ajaki Yisui alima nung yimli ka yangertsü ta bilema aliba sayur. Parnok ajaki tashi aliba jenjangtem aginüa liasü.

Pei tanurtem taküm junga lidaktsünüba tetsü kaji iba ya lir, la taküm tia dang nungi tajungba lidaktsünü. Iba tetsü indang tenüng metetshiba tetezi la indang maitsüji (identity) tetsü ka ta asüba lir. Shibai metet, iba ajanga iba mapang tetsütem

indang jenjang sayur asütsü akok – teburtemi amokbanger aliba alima nung tetsürtem teküpokba jenjang nung ayuba. Lar jabasotem tashi aliba yimsüsürtem kümra, la indang jenjang tajungba akümtsü ta lai bilem asütsü akok.

Mesüra shibai metet, lar jabasotemi la dang Yisu dang parnok atema jembijang ta la mesüzük asütsü akok. Tenati aginüba atongtsü atema la nübu amshi südi. Shibai metet, tashitait aser tashi alirtem aliba lima ka nung, lar jabasotemi loktiliba nung sadoka alitsü atema lai langka inyaktsüla ta lai bilem asütsü akok.

Tang asenoki temalen agüja aliba tetsü aser Luk 18: 5 nung tanen makai inyakba amitsür na medememdangdi. Iba tetsür ya balaka liasü, ochimashi obendanger ka dang tanen makai temeten meshi. Iba otsü nung la anema komala mapa ka inyak'arasenoki memetet, saka lai temeten angutsü atema maneni noktak. Lai temeten mangu tashi lai animesüngzük. Obendangeria iba tetsürla indang ken o angadanga obendang magütsü tashi pa animesüngzüksü ta meteta lir. Anungji, pai la indang ken o angadanga obendang agütsü, iba ya la atema aria bilemtsüba agi masü, saka lai pa meinprongba anendaktsütsü atema lir.

Tanen makai noktakba indang tatishitsütem nung itemi lir - Yisu tetsüng nung totzü mezütsü atema Farise nunger ki kati atuba tetsür; Yisu reprangtsü atema süngdongi atuba alimelen sarur; aser Yisu nungi tokyimra aketer ka tanepstsü angutsü atema tangar kilem nung tapok apaba medemer pezü. Item nisung ajaki Tsüngrem anasa aotsü atema

tangari meinyakba mapatem inyak, aser iba atema Tsüngremi parnok moatsü. Aser Tsüngremi item amala teyari nüngdakba nisungtem maneni moatsür.

Asenoki tanen makai aser tasü itta meshiba ajanga Tsüngrem mejashidaktsür. Saka Tsüngrem dang nüngdak meshiba aser asen meyong masüba kar tashiyim agi meshiba tetsüngda telatetba ka alitsüla. Zebedi'er jabaso tetsü dang Yisui "... kü tajichilen aser kü tabelen amentsüji ni agütsütsü masü, saka kü Bui aji shir atema renem parnok asoshi lir" ta langzü.

Zebedi'er jabasotem dang Tsüngmok indang Jabasotem (Sons of Thunder) ta aja. Parnok ya kechi ajurudir ajuruaka noktaktetba nisungtem liasü, temulung ulua toktepertem aser dara liasü. Aser tenati tetsü dak aketba temulung uluba sempet agizük asütsü südi. Saka Tsüngremi tena ken yongi

melenshitsü. Tena akümlı taküm tembangdang, tanga ka atema ajaki meteta aküm. Yakob ji taküm bendanga agütsüba mezüngbuba sayutsüngir aküm aser Yohan ji temeim indang sayutsüngir ka ta tetshi. Tetsüi tena tarutsü taküm jenjang atema kanga shisabuluba to amajok, kechiyong lai bilemba ama mesüaka, tena taküm tajungba nung litet!

Shibai metet, tetsütemi pei chirnur tarutsü atema kanga shisabulur. Chirnurji koma ka tain aküm yonga, tetsütemi pei tanurtem taküm sadoka lidakstsütsü atema inyaker. Pei kibong atema tanen makai sarasademer aser Yisu dangi anir aoba tetsü ka nem tenüngsang agütsütsüla, saka tim masüba inyakyim ajanga loktiliba nung chinurtem langka ka tongdaktsünüa inyakba tetsüibo, actress anati tang ajurua aliba ama timtem ajurutsü.

# MISSION OSANG

LIMAAKUM | MISSION DIRECTOR

## 1. Anini Area Evangelist Sodi Agir

**M**r. Bendang Ao, Yinsem Fellowship nungi Anini (Upper Dibang Valley District HQ) Area Evangelist inyaktsü asoshi 25<sup>th</sup> September 2016 küm Anini Town Baptist Church nung Installation agia liasü. Küm asem tashi Arogoi wadang nungloktsüba ama kanga meranga inyaker 8<sup>th</sup> September 2019 nü mapa nungi sodi agiogo. Arogopur ajaki asen tenzüker den tepelaba tulu lemsateper. Tsüngremi tenzüker taküm aser kibong Pa sentswangshi tulu asoshi maneni mojangma.



## 2. Non-Local Evangelist Ministry (Reporter: Pradip Tati, Non-Local Evangelist)

June 2018 nungi September 2019 report tatsü agi yamai lemsateper.

June 2018 nungi tanü tashi nung non-local nisung ter ka (11) tzü nung baptitsüogo (Manipuri, Bengali, Khasi, Adivasi, Boro, Mesh Kachari). Aser item tamangertem pei oshi jembiba arogo dangi membership belena yukogo. Maneni, nisung lir ana (42) converts lir saka ano baptism magi anungji, arogopurtemi parnok asoshi maneni sarasadem nung yaritsü asoshi sarasadem khuret ka lemsateper.



# MUSIC MINISTRY OSANG

TALIMEREN | MUSIC DIRECTOR

**S**eptember ita nung music ministry ajanga inyakbatem:

14<sup>th</sup> September 2019 Fellowship ajak nung Kenten Sentong kiyong shiai shilem agia liasü.



YINSEM



TOWN



LUNGMIN



YONGKUM



MERALI



SIGNAL



DUNCAN



SÜMEDEM